

Li Laus



Felibrige

**LAUS
DE
ENRI DORIAC**



**Jano BLACAS
Felibre Majourau**

**LAUS
DE
ENRI DORIAC**
(1920 – 2007)

Cigalo dis Isclo

Santo-Estello de Sant-Iriès la Percho

CIGALO dis ISCLO

1881

François DELILLE
(1817 – 1889)

1889

Albert Joseph RIEUX
En religion et littérature : **Xavier de Fourvière**
(1853 - 1912)

1913

Louis CHARRASSE
(1868– 1927)

1928

Joseph GIORDAN
(1878 – 1963)

1964

Raoul ARNAUD
(1901 - 1974)

1975

Louis BRIBOT
(1910-1988)

1989

Henri DORIAN
(1920 – 2007)

2011

Jeanne BLACAS

Gènto Rèino, Segne Capoulié, Cars ami Felibre,

Quouro rescountrave lou Majourau Enri Doriac, ai souvenènço que me venié à l'endavans, li man óuferto, talo dos flour d'amista.

Me pensave : es un ounèste ome.

Vrai, lou mot à cambia au rajant dóu tèm.

Lou chivalié de l'Age Mejan, esperavo soun adoubamen dins qu'uno vihado, counsentido à soun endevenènço d'ome fa, d'ounèste ome dins si raport emé soun segneur, aparant la femo e l'ourfanèu. Avié d'èstre un ome leiau.

Es-ti que lou Majourau Enri Doriac avoudè pas parieramen sa fe à la causo mistralenco em'uno ounesteta founso e pleniero?

L'ounèste ome dóu Siècle di Lumiero, saludè la resoun à soun trelus, n'en fasènt la fundamento de si counaissènço e soun espèr d'un mounde meieur, enlusi de si certitudo passado au sedas dóu sabé.

Es-ti que lou Majourau Enri Doriac fuguè pas un ome de resoun, éu qu'aguè en eiretage lou soulide judice di gènt de la mar, tambèn coume lou dóu mestierau dóu pan, noble prefa entre tóuti ?

Umblamen segur, l'ome de bèn, ounèste, souvèto que d'ajuda lis àutri, de fes meme au destrimen de soun de-qué e de soun tèm.

Crese que lou Majourau Enri Doriac fuguè d'en proumié un ounèste ome de bèn, d'uno bounta qu'es rèn de dire e serviciable à noun plus.

Dins lou debana de sa vido, Enri Doriac nous semound lou retra de l'ounèste ome, sènso deco poussiblo.

Aquesto ounesteta bountouso tèn coumpagno à mant uno vertu.

Lou fabulisto Esope afourtissié que la lengo es la meiouro vo la pièje di causo, en acourdanço emé lou Bèn que lausenjo l'ome vo lou Mau que lou desounouro.

Partènt di sèt pecat capitau, poudèn, à rebussitè, avaloura lou Majourau Enri Doriac dins lis esplecho de sa vido.

Avès tóuti souvenènço dins voste jouine tèm, de l'escoulan peresous, que la mestresso, aguènt embrassa l'aubre de la paciènci, mandavo, fin finalo s'ajouca au founs de la classo.

Dins sa mouralo ié venié : « regardas-lou, es feiniant coume un chin d'ermite ». Quouro sara grand troubara la terro basso e acampara jamai fourtuno.

Vitour Gelu fai lou laus d'aqueste fulobro :

« qu es pas feiniant
qu es pas groumand
qu'un tron de Diéu lou cure! »

E « pèr li feiniant, tóuti li jour soun fèsto » dis lou prouvèrbi.

Lou feiniantige sarié-ti uno vertu ?

Lou Majourau Enri Doriac, éu, fuguè-ti peresous vo travaiaire dins soun enfanço e sa jouinesso ?

Es nascu lou lié de Novèmbre 1920 à Vilocroso dins lou Var.

Èro l'einat d'uno famiho que countavo sièis drole. Avié de douna l'eisèmples e de fila dre.

Lou feiniantige, counèissié pas. Passa lou Certificat d'Estùdi, lou placèron aprendis bouchié carsaladié à Flayosc. De 1935 à 1937, faguè l'ana-veni à biciécletto desempièi soun vilage, que tèm que faguèsse : uno bello estirado !

Avié pas lou tèm de se bressoula.

S'anuchavo e toumbavo pèr pèço sus soun lié, coume un soucau.

Emai, soun patroun avié un oursin dins sa pèchi. Tout travai s'amerito sa pago. Quand sias jouine avès d'envejo. Passo muscado, Enri n'aguè soun proun e roumpè busqueto.

Èro uno font de travai e decidè d'afana soun pan ounestamen.

E lou Felibrige lausenjara aqueste jouve que soun achinimen au travai noun decessara tout de long de sa vido felibrenco.

La vido es pas toujours eisado e noun vous poudès paga tout ço que vous fai lingueto.

À passa-tèm, lou biais de viéure èro proun tihous.

« Faire pichoun » n'éro la raganello de la femo d'oustau.

Lis enfant avien bèl à supli la maire, ié venié : « acò's de fum de tèsto ».

Mai, bono pasto, troubavo toujours, ié fasié sabour em'un jèsus sucous vo uno roustido que vous disié « manjo-me ».

Parié pèr li vèsti, devien teni tres an : braio pedassado e debas sarci, fasien provo d'uno femo de gouvèr.

La mostro, la biciéucleto, falié espera de gagna soun croustet.

Aurias pas renega Beaumarchais parlant de « l'envejo di det croucu » que coungreio la jalousié e l'ahiranço, nimai Vitor Hugo afourtissènt qu'« un jouve, tant paure que siegue, se peto de la bono santa e s'es plen d'envans, pourtara toujours envejo à-n-un empeaire ».

Drouloun, lou Majourau Enri Doriac couneiguè segur d'envejo de roussignòu, mai éro bon coume de pan signa.

Trevè l'Escolo dis Aprendis Mecanician de Sant-Mandrié.

Dous an de tèms, de 1937 à 1939, pico, bacello pèr farga li pèço di batèu. Èro uno escolo militàri que dounavo d'ome soulide fisicamen e mouralamen.

Parlas de flandrineja ! Tout au contro, aguè en partage li cous dóu sèr e daverè de bon brevet.

Dins lou meme tèms, intrè à l'Escolo de la Targo à Touloun, pèr estudia d'à founs noste bèu parla. Seguiguè l'ensignamen dóu Majourau Pèire Reynié e se liguè d'amista emé lou Majourau Jonnekin e sa gènto mouié la Rèino Viveto.

Plaço au partage dóu sabé emai de l'amista tant precioso quand s'aubouro un marrit vènt.

E lou Felibrige lausenjara aqueste jouvènt que, tre sa jouinesso, s'atalentè à la Lengo Nostro.

Ah ! Bello jouinesso, jouinesso ardènto, uno idèio de trop bessai, que, à tort vo à dre, s'encagno eisa.

Alor, lou jouve s'enfurìo e lou tron de Diéu ié peto. Part de soun repaus, de cop meme mounto sus sa figuiero.

Parentèlo, ami, n'an plus ges de noum pèr éu. La coulèro es de marrit counsèu, noun respèto li sentimen li mai sacra. Li poung fa, bouie coume uno oulo de cese, es capable de faire un massacre, d'enca 'n pau ié vendrié lou santifecetur. La resoun restanco plus soun judice.

L'ome es proche de la bèsti.

Lou Majourau Enri Doriac fuguè-ti éu tambèn agarri pèr aqueste sentimen destrùssi de touto aviado umano ?

Que nàni !

La guerro de 39/45 espèto ! L'escaufèstre ! Coulèro, justo coulèro.

Alor s'engagè voulountàri dins la Marino.

S'embarquè sus « L'Albatros » batèu legendàri que couneiguè la mitraio mai que d'un cop, pièi sus «L'Amiral Mouchez ».

Uno garbelado de decouracioun guierdounèron soun courage e sa valentiso sus l'Outro-Mar e lis oucean, en particulié lor de la campagno maritimo de Norvik.

Jamai fuguè blessa. Nouv an d'uno guerro achinido. Arrestè. N'avié soun proun.

Èro à mand d'intra dins la gendarmarié. Toujours l'armado.

Riscavon de lou manda en Indouchino, tournamai dins d'endré ounte la bataio s'averarié crudèlo.

Aro, pantaïavo d'uno vido tranquilo, sènso tempèri.

Pèr noun dessaupre sa maire, tant fièro de soun fiéu, Quartié-Mèstre de proumiero classo, ié venguè : « Maire, m'an pas vougu, siéu trop rabasset !».

Prouvènço l'esperavo.

E lou Felibrige lausenjara aquest ome courajous que, ja, anunciavo si batèsto pèr manteni.

Lou tèms dóu calignage s'adus emé soun entento fino, si tèndri sentimen, sis escoundudo secrèto à la chut chut di cor.

Fau bèn capita, qu'uno marrido fiho saup ounte lou diable tèn sa ferramento.

Alor lou gourrinige e la riboto soun au rescontre d'uno eisistènci apourridido.

Calendau nous assabento :

« e de boumbanço e de lussùri
naïsson furour, naïsson injùri »

parieramen Rouman Rolland noto : « la lussùri es lou maje pecat, lou que empouisouno li rajòu au sourgènt de la vido ».

Coume se pèutira d'aqueste desoundro-famiho ?

Segne Enri Doriac, ome d'ounour sabié que «femo ounèsto a ges d'auriho » e, fidèu à sa mouié, ié faguè milanto ounesteta tout de long de sis an.

Lou vaqui lou país ount la lus es tant bello : sa Prouvènço tant eimado que sa lengo l'encanto.

Se ié maridè en 1946 emé Simouno.

Naiisson dous garçoun Richard e Gui; soun au trignonou dóu bonur. Abali si pichounet, li tintourla, i'aprendre la vido à la modo prouvençalo, si conte , si legèndo, tresor d'un patrimòni perdurable, ié fisa nòsti tradicioun, subre-tout

i'ensigna emé la santo paciènci di papet e di mameto, li mot suço-mèu de nosto lengo tant bello, que prendran d'alo e resclantiran bessai plus tard dins si vido d'ome fa.

Vido simplò, ounèsto, ufanouso, que porto espèr, coume la femo en sa plenour.

E lou Felibrige lausenjara aqueste paire qu'encaminè si fiéu dins la draio mistralenco.

Vaqui vengu lou tèms de la vido en famiho.

Pamens s'oublidon pas lis ami, li vesin, la parentèlo e, mai d'un cop, li fèsto sounado à brand, acampon la sequèlo di groumandoun.

Segur, es pas pecat d'eima ço qu'es bon. Rousseau deja remarcavo :

« L'amo d'un groumand es touto dins lou cèu de sa bouco ».

Mai faudrié pas que s'endevenguèsse un groumandas emai un ibrougnas. Lis escoulo feniero arrouinon un oustau e li galavard an ges de retengudo que restanque sa santa.

Óubliden pas que « la soubrieta es lou proumié medecin ».

Un lipet, tout au contro, fai d'uei de cassounado i mèisse de requisto.

E Prouvènço es prouvesido de bòn recèto.

En 1946, lou Majourau Enri Doriac coumenço sa vido d'assurour, barrulo dins lou relarg e obro pèr la causo prouvençalo. Pièi se fai boulenyé e païsan dins la poulido viloto de Mountfort sus Argèns, reprenèt lou mestié e la boutigo de si bèlli-gènt. N'en falié de courage à-n-uno epoco que la mecanico mestrejavo pas lou travai ! Lou fournié devié se leva d'ouro pèr pasta lou pan, de man d'ome, pièi teni d'à ment la cuecho d'aquesto nourrituro sacrado touto embaussumado de l'oulour di feïssino. M'es esta di que lou Majourau Enri Doriac èro un lipet e un fin cousinié. Rèn d'estouant au païs mountagnié di rabasso e de l'auceliho tant goustouso qu'es un chale de la vèire vira à l'aste davans l'escandihado que recampo parènt e ami. Lou Majourau Gui Giraud, soun cardacho, èro de tóuti li fèsto. Hou ! Sian pas de gousto-soulet !

E lou Felibrige lausenjara l'amista d'un ome que recampè parentèlo e ami, lis enliamant dins la grando famiho felibrenco.

N'en couneissèn à mouloun de gènt sara coume uno pigno verdo, d'esquicho-bougneto, que toundrien un iòu e n'en vendrien sa lano. Pèr lou faire court, li que l'avariçun es pèr éli uno vertu, se leissarien creba de fam, se regretarien lou pan, pulèu que de desnousa soun boursoun. Ma grand ié venié « aquelo es pas douneto » e ié viravo l'esquino. En un tèms que fasièn just babau li lèi toucant « Li Soucialo » falié èstre regardant. Espargno e avariço èron tout un, e la femo de gouvèr ensignavo à si fiho coume teni targo à la mau-parado, metènt de caire à cha un sòu.

Lou Majourau Enri Doriac couneiguè segur aqueste biais de vieüre, que l'avariço, de défaut se mudavo en vertu. Empachavo pas li gènt de s'ajuda, liogo de resta asseta sus sa cachomaio. Enri Doriac fuguè tout tèms un ome de bèn. Soun acioun soucialo s'amerito de n'en parla. Fuguè jamai escap d'ativeta.

Trento an de filo fuguè counseié municipau privilegia dins soun vilage : uno bello cargo ounte s'espremiguèron sa coumpetènci e sa generouseta. Clavaire de la « Residènci di retrata de Vau Verdoun » coumpliguè tambèn uno bello obro.

Èro de tóuti li fèsto, de tóuti li manifestacioun, luchant pèr manteni li tradicioun dóu païs.

Ourganisè un oumenage soulenne à la memòri dóu Majourau abat Leoun Spariat.

Es éu encaro qu'engimbrè emé bonur la Santo-Estello dóu Lavandou.

En 2004, pèr lou cènt-cinquantenàri dóu Felibrige, faguè bateja en prouvençau la « Plaço dóu Felibrige » dins soun vilage.

Creè l'assouciacioun «Li Cigaloun prouvençau » pèr ensigna li cous en lengo nostro dins soun endré.

Mèmbe foundadou dóu « Centre Culturau Prouvençau » de Draguignan, ajudè tambèn à l'espelido d'escolo de prouvençau à Draguignan, La Verdiero, Li Rouviero, l'Escolo di Moulin à Trans de Prouvènço.

Un fais de travai e d'annegacioun souto un risoulet plen de gentun e de bounta. Quanto generouseta !

E lou Felibrige lausenjara l'ativeta d'un Majourau, que, sènso relàmbi, engimbrè fèsto, manifestacioun, cous, pèr la plus grando glòri de Prouvènço

L'ourguei la croïo, quènti marrit coumpan !

La terro lou pòu plus pourta aquel ome; tèn lou camin, s'embraïo bèn aut, l'èr avantajous e la voues bronzido.

Vous largo si counsèu coume siguessias entrepacha e qu'aguessias besoun d'éu soulet pèr regla vosto vido.

Es glourious de que ? De soun bèn, de sa fourtuno, de sa famiho, crespina dins lou moumen.

Óubliden pas que « Ourguei e graisso Diéu lis abaisso ».

Tant se poudrié que, lèu, fuguèsse òubliga de beissa la crestò.

Lou travai, lou courage, la tenesoun, nous dèvon teni coumpagno; alor l'ourguei s'endevendra justo fierta.

O, es em' uno justo fierta que poudèn dreissa lou cursus de la vido felibrengo dóu Majourau Enri Doriac :

1961 : es marca au cartabèu dóu Felibrige

1965 : es souto-sendi de la Mantenènço de Prouvènço

1967 : es Mèstre d'Obro dóu Felibrige

1989 : es Majourau sus la Cigalo dis Isclo, à la Santo-Estello de Perigus.

Èro l'eiretié d'uno cigalo prestigioso tengudo en rèire pèr :

- **Francés Dellile** galejavo soun noum : Delille /De l'île/ De l'isclo/ ; dis isclo que s'endevenguè lou de la Cigalo dis Isclo.

- **Savié de Fourvieres** : Paire blanc premoustra. Nous laisso l'ineestimable Pichot Tresor.

- **Louis Charrasse** : sa deviso èro: « Lou Bèu, lou Bon e lou Verai »

- **Jousè Giordan** : fuguè lou proumié Majourau niçard.

- **Ravous Arnaud** : avié pèr deviso : « Sènso amista, de que sarié lou mounde ! »

- **Louis Bribot** : signavo de soun escais-noum : Jan dóu Malmont.

De noumbróusi decouracioun militàri englourion sa vido :

medaio d'engaja voulountàri

crous dóu coumbatènt 39/45

medaio de guerro 39/45 emé barreto

medaio pèr li coumbat en Nourvejo, Mar dóu Nord, Mar Atlantico, Mar Mieterragno

medaio dóu Cors espedicionàri de la guerro d'Itàli

medaio d' Outro-Mar

De decouracioun civilo l'ounouoron tambèn :

medaio de vermei de l'Unioun Federalo dis Ancian Coumbatènt

medaio de vermei naciounalo, despartamentalo, coumunalo.

Que dire mai...

E lou Felibrige lausenjara la longo tiero di guierdoun que lou Majourau Enri Doriac s'ameritè plenamen.

Davans lou cros dóu Majourau Enri Doriac, lou Capoulié En Jaque Mouttet, lausenjà lou felibre d'elèi, un acampaire, un ourganisaire de triò, qu'emé sa fe e soun gentun aduguè sa pèiro à la mount-joio de la causo felibrenco.

Lou Majourau J.M. Courbet, baile dóu Felibrige, escriéu, rendènt oumenage au Majourau Enri Doriac defunta lou 27 de desèmbre de 2007 :

« Lou Felibrige regrèto un ome d'acioun, un ome amourous de sa terro e de sa lengo, toujours lèst à oubra pèr lis idèio mistralenco. Rèsto tambèn un ome afable, d'un gentun e d'uno simplicita remirable ».

Lou Majourau Reinié Raybaud acabo uno pouèsio en soun ounour, disènt :

«Fasès ounour à la Prouvènço
Osco , Moussu lou Majourau ».

Lou Felibrige avalouro lou Majourau Enri Doriac, que tout de long de sa vido, sènso n'aguè l'èr, coumpliguè uno toco discrèto e eficiènto dins l'amour e la lus que pourtavo à sa bello Prouvènço.

Jano de la Pampeto
Santo-Estello de Sant-Iriès
Lou 27 de Mai de 2012